

**Месяца Декаввриа в 26-й день
Преподобнаго Никодима Тисманскаго**

На Велицей Вечерни

На Господи возвах: стихиры, глас 4:

Был еси подобен пророку Илии, / правую верою сияй и в пустыни живай. / Подвизался еси Святому Жертвеннику, отче Никодиме, / и бдению молитвенному прилежал еси, / и твоими молитвами утвердил еси святую Лавру Тисманскую. / Моли Христа Бога, да спасет души наша.

Наследниче Христов, / служителю Господень, святе Никодиме, / по имени твоему тако и житие твое: / спросия бо седине разум, / свидетельствоваше светлость лица твоего душевное незлобие, / извествоваше кротость слова молчаливое. / Жизнь твоя славна и успение со святыми, / моли о душах наших.

Оставив мирския сласти, принесл еси Христу свое чистое житие / и подвизався во всяцей добродетели, преподобне, / утвердил еси себе в вере истинней. / Тем тя славим, отче Никодиме, монахов похвало, / молися о душах наших.

Твое светлое житие просия на земли, богомудре Никодиме, / и вознесе тя на небеса во светлость всех святых. / Пребывая в добродетелех на земли, / приял еси на небесех наследие, / идеже в вечней радости живещи. / Молися непрестанно Господу, / да сохранит в мире честную и великую твою Лавру Тисманскую, / мирови же дарует спасение и душам нашим велию милость.

Слава, глас 6:

Еже по образу соблюд невредимо, ум владыку над страстьми пагубными постнически поставив, во еже по подобию яко мощно возшел еси: мужески бо естество понудив, потщался еси худшее покорити лучшему, и плоть поработити духу: темже монашествующих явился еси верх, житель пустынный, благотекущих обучитель. Правило добродетели известнейшее, и ныне на небесех, зеркалом разрешшимся чисте зриши Святую Троицу, моляся несредственне о иже верою и любовью чтущих тя, преподобне отче наш Никодиме.

И ныне, Праздника, глас тойже:

Слава в вышних Богу, и на земли мир, днесь восприемлет

Вифлеем Седящаго присно со Отцем, днесь Ангели Младенца рожденнаго боголепно славословят: слава в вышних Богу, и на земли мир, в человецех благоволение.

Прокимен великий, глас 7: Кто бог велий, яко Бог наш? Ты еси Бог творяй чудеса. Стих: Сказал еси в людех силу Твою. Стих: И рех: ныне начах, сия измена десницы Вышняго. Стих: Помянух дела Господня. И паки: Кто бог велий, яко Бог наш? Ты еси Бог творяй чудеса.

Премудрости Соломоновы чтение (главы 5 и 6):

Праведницы во веки живут, и в Господе мзда их, и попечение их у Вышняго. Сего ради примут царствие благолепия и венец доброты от руки Господни, зане десницею покрывает я и мышцею защитит их. Приимет всеоружие рвение свое и вооружит тварь в месть врагом. Облечется в броня правды и возложит шлем суд нелицемерен. Приимет щит непобедимый преподобие, поострит же напрасный гнев во оружие, споборет же с ним мир на безумныя. Пойдут праволучныя стрелы молниины и, яко от благокрутла лука облаков, на намерение полетят, и от каменометныя ярости исполнь падут грады. Вознегодует на них вода морская, реки же потопят я нагло. Сопротив станет им дух силы и, яко вихор, развеет их, и опустошит всю землю беззаконие, и злодейство превратит престолы сильных. Слышите убо, царие, и разумеите, навыкните, судии концов земли. Внушите держащи множества и гордящиися о народах язык, яко дана есть от Господа держава вам и сила от Вышняго.

Премудрости Соломоновы чтение (глава 3):

Праведных души в руце Божией, и не прикоснется их мука. Непщевани быша во очесех безумных умрети, и вменися озлобление исход их, и еже от нас шествие сокрушение, они же суть в мире. Ибо пред лицом человеческим аще и муку примут, упование их безсмертия исполнено. И в мале наказали бывше, великими благодетельствовани будут, яко Бог искуси я и обрете их достойны Себе. Яко злато в горниле, искуси их и, яко всеплодие жертвенное, прият я. И во время посещения их возсияют и, яко искры по стеблию, потекут. Судят языком и обладают людьми, и воцарится Господь в них во веки. Надеющиися Нань разумеют истину и вернии в любви пребудут Ему, яко благодать и милость в преподобных Его и посещение во избранных Его.

Премудрости Соломоновы чтение (глава 4):

Праведник аще постигнет скончатися, в покои будет. Старость бо честна не многолетна, ниже в числе лет исчитается. Седина же есть мудрость человеком, и возраст старости житие нескверное. Благоугоден Богови быв, возлюблен бысть и живой посреде грешник прославлен бысть. Восхищен бысть, да не злоба изменит разума его или лесь прельстит душу его. Рачение бо злобы помрачает добрая и парение похоти пременяет ум незлобив. Скончався в мале, исполни лета долга, угодна бо бе Господеви душа его, сего ради потщася от среды лукавствия. Людие же видевшие и не разумевше, ниже положше в помышлении таковое, яко благодать и милость в преподобных Его и посещение во избранных Его.

На литии стихиры, глас 1:

Кто возможет сказати твоя страдания, блаженне отче? И кто исчислит твоя подвиги? Брань противу демонов, слезы и сокрушение сердца, пост и пустынное житие? В телеси бо пожил еси, яко безплотный, и ныне вся верныя веселиши праздником своим. Молися Христу, да избавит нас от злых искушениях, преподобне Никодиме.

Глас 2:

Преподобне отче Никодиме, подвизался еси усердно от младости твоя в добродетелех и явился еси орган Духа Святаго. Прияв от Того дар чудес, учил еси люди телесных сластей отвращатися. И ныне, божественною светлостью осияваемь, просвети ум наш, с верою и любовию тя славящих и кланяющихся святым твоим мощам.

Глас 3:

Житие твое божественно, священно же и скончание твое, святе Никодиме! Тем от всех конец собращася иноцы со множеством верных в честную твою Лавру Тисманскую. И егда ты видеша на одре лежаща, вопияху жалостно: Рцы последнее словом рабом твоим, святе. Како, отче, оставляеши сынов своих, ихже изволил еси? Обаче, аще и ляжеш во уготованный ти гроб, мы вси ты имамы горе яко предстателя пред Святою Троицею и молитвеника о спасении душ наших.

Слава, глас 4:

Вся земная оставль, тленное и преходящее презрел еси. Просветив душу свою Божественными заповедьми, святыми

добродетельми украсился еси, святе. Вселивжесея в пустыню, изволил еси Христа, Иже вкупе со Отцем и Духом вселися в тя. Сего ради приял еси дар чудеса творити, исцеляти и избавляти от нечистых духов. Темже тя и Христос Бог прослави, Егоже моли, преподобне, да помилует души наша.

И ныне, глас 5:

Вострубим трубою песней неизреченную тайну, днесь в Вифлееме исполньшуюся: Незримый видится, Безплотный воплощается, Слово человеческий зрак приемлет, Иже прежде всяческих бысть, Дева роди Младенца в вертепе, Творца мира всего, ясли Небесный Престол образуют, пастыри чудятся, мудрецы дары приносят и Ангелы воспевают: Слава в вышних Богу, и на земли мир, в человецех благоволение. Превечный Еммануил благоизволи родитися спасения ради мира, Иисус Христос, Тойже вчера, днесь, и во веки вся.

Стихиры на стиховне, глас 8:

Честна есть пред Тобою, Христе, смерть преподобнаго Твоего, служитель бо Твой, святой Никодим, благодатию Духа Святаго, от младости твори чудеса, по преставлении же болезни исцеляет и духи злобы отгоняет, с нимиже брався во всем животе своем, душам же нашим просит от Тебе великия милости.

Стих: Честна пред Господем смерть преподобных Его.

Раку мощей твоих, премудре Никодиме, показа Господь людям, яко источник чудес: слепым бо дарует зрение, немощи исцеляет, стужения нечистых духов избавляет, и всем верным бывает залог спасения.

Стих: Блажен муж, бояйся Господа, в заповедех Его восхощет зело.

Радуйся, монахов украшение, звездо путеводная пустынником и постником, пастырей похвало, святе отче Никодиме! Радуйся, источнике любви и чистоты! Радуйся, обителище Пресвятыя Троицы! Радуйся, пресветлый светильниче премудрости! Радуйся, предобрый учителю всех христиан, добродетелей образе, столпе духовный и молитвенниче о спасении душ наших.

Слава, глас 4:

Преподобне отче Никодиме, был еси учитель и советник обители твоей и верным. Словесы бо и дела научал еси вся познати заповеди Христовы. Тем и ныне не остави нас, но пребуди духовно с нами, управи нас на путь добродетели и

сотвори достойны небесных обителей, да представше Христови, радуящися, речеши Ему: Се аз и дети, яже дал ми еси, Боже! Мы же да возглаголем: Се, Господи, наш учитель спасения и отец возлюбленный, врач душ наших, егоже даровал еси нам. С нимже удостойны, Владыко Христе Боже, жизни в Твоих вечных пресветлых чертозах, да Тя прославим со Безначальным Твоим Отцем и Пресвятым Духом во веки. Аминь.

И ныне, Праздника, глас 8. Иоанна Монаха:

В Вифлеем стекошася пастырие, / истиннаго возвещающе Пастыря, / сидящаго на Херувимех / и возлежащаго в яслех Младенца зрак восприимша нас ради, / Господи, слава Тебе.

Тропарь, глас 1:

Рожденному от Девы Началопастырю / последовал еси, отче наш Никодиме. / Постом, бдением и молитвами / небесная дарования приим, / исцеляеши недужныя и души верою притекающих к тебе. / Тем вси вопием: / слава Давшему ти крепость, / слава Прославльшему тя, / слава Действующему тобою всем исцеления.

На Утрени

По 1-й кафизме, седален, глас 4:

От младости зову Господню последовав, отрелся еси мира со всеми сластями его, преблаженне отче Никодиме, претерпел еси без роптания вся тяготы пустыннаго жития и демонския ковы разрушил еси. Тем присно в песнях славим память твою.

Слава, глас 1

Подобен: Гроб Твой, Спасе:

Яко пресветлая звезда монахом, и держава воздржания пустинником, и светлое зеркало благоразумия, показался еси, преподобне. Тем тя молим: Проси прощения прегрешений днесь радостно прославляющих святую память твою, преблаженне Никодиме.

И ныне, Праздника, глас 1:

Господу Иисусу рождшуся в Вифлееме Иудейстем, от восток пришедше волсви, поклонишася Богу вочеловечшуся, и сокровища своя усердно отверзше, дары честныя приношаху: искушено злато, яко Царю веков: и ливан, яко Богу всех: яко тридневному же мертвецу смирну Безсмертному. Все языцы, приидите, поклонимся рождшемуся спасти души наша.

По 2-й кафизме, седален, глас 5

Подобен: Безначальное Слово:

Величаем похвалами подвижника Господня, той бо утишив вся бури страстей, воздержанием и терпением посрами врага и одоле того лукавство и силу. И ныне молится ко Господу спастися душам нашим.

Слава, глас 4

Подобен: Удивися Иосиф:

Освящен от матери утробы, святе Никодиме, на земли яко ангел пожил еси, плоть свою укротив, и явился еси служитель Святыя Троицы. Собрал же еси монахов множество, последовавших тебе. Молися Христу Богу, да дарует прощение грехов любовью прославляющим твой святой праздник.

И ныне, Праздника, глас тойже:

Что чудишися, Мармам? Что ужасает еже в Тебе? Яко бездетна Сына в лета родих, рече: рожденнаго зачатия не навъкши, безмужна есмь и како рожду Сына? Безсеменно рождение кто виде? Идеже бо Бог хочет, побеждается естества чин, якоже пишет: Христос родися прежде падший возставити образ.

Полиелей и величание:

Ублажаем тя, преподобне отче Никодиме, и чтем святую память твою, наставниче монахов и собеседниче Ангелов.

Псалом избранный преподобному.

По полиелеи, седален святого, глас 1

Подобен: Гроб Твой:

Укротил еси плотския востания подвиги своими, преподобне отче Никодиме, и сподобился еси жизни вечныя. Тем Церковь Христова и твоя Лавра, празнуют днесь дивную память твою, преподобных украшение и постников похвало.

Слава, глас 3

Подобен: Красоте девства:

Видевше Ангели красоту души твоя, святе Никодиме, радостно воспеша во исходе твоём: Вознесися ко Господу, Егоже возлюбил еси, оставль земное, прими небесное и радуйся вкупе со Ангелы и со всеми святыми.

И ныне, Праздника, глас 4

Подобен: Удивися Иосиф:

Приидите, видим, вернии, где родися Христос, последуем прочее, аможе идет звезда с волхвы, восточными цари, Егоже Ангели поют непрестанно тамо, пастырие свиряют песнь

достойную, слава в Вышних, глаголюще, днесь в вертепе
Рождшемуся от Девы и Богородицы в Вифлееме Иудейстем.

Степенна, 1-й антифон 4-го гласа.

Прокимен, глас 4: Честна пред Господем смерть преподобных
Его. **Стих:** Что воздам Господеву о всех, яже воздаде ми?
Евангелие от Луки, зачало 24.

По 50 псалме, стихира глас 6:

Преподобне отче Никодиме, / Христови возложився, телесныя
страсти низложил еси, / тем во всю землю изыде вещание
исправлений твоих: / на небесех же обрел еси мзду трудов твоих, /
демонская разорил еси полчища, / и Ангельския достигл еси
чины, / ихже житию непорочно поревновал еси. / Дерзновение
имея ко Христу Богу, / от Негоже венец терпения приял еси, /
испроси своими молитвами душам нашим велию милость.

Канон, глас 1

Песнь 1

Ирмос: Христос рождается:

Иже блаженства достигий, преподобне Никодиме, пребывай
выну со Христом, подаждь нам радостно прославить твой
пресветлый праздник.

Возненавидел еси мирский живот и изволил еси пустынные
подвиги, воздержание, кротость и внимание, молитвы, слезы и
всенощныя бдения, отче святе Никодиме.

Мирския сласти, пожигающия человека, яко огонь, угасил еси
росою воздержания, темже возсия ти солнце безстрастия,
светлость же исцелений и изобильных дарований Духа Святаго,
достохвальне отче Никодиме.

Богородичен: Чуднаго Рождества Твоего величие в род и род,
Пресвятая Богородице, Тем Тя славим, яко Защитницу нашу и
Избавительницу.

Песнь 3

Ирмос: Прежде век от Отца:

Верую зряя свет Господень, преславне Никодиме богомудре, со
слезами молился еси, темже радости сподобился еси
неизреченныя.

Душу мою помраченную злыми помыслы просвети, Слове
Человеколюбче, молитв ради преподобнаго Никодима, и избави
меня в день Суда, Милостиве.

Сматряяй духом небесныя красоты, от человек чести и похвалы не приял еси, на небеса крилами смирения возносяся, преблаженне **Никодиме**.

Богородичен: Вышше Херувим и Серафим показалася еси, Богородице, едина бо в Себе поносила еси Невместимаго Бога, темже Тя вси вернии песньми величаем.

Седален, глас 8

Подобен: Премудрости:

На земли яко ангел в телеси явился еси, и яко древо, насаждено при водах воздержания. Омыл еси нечистоту потоки слез своих, и показался еси божественное обиталище и чудотворец, пламень огненный угасив, и николиже ти той коснеся, Бог же тя прослави и приял еси от Него, яко награду, Царствие Небесное. Егоже непрестанно моли, да дарует оставление грехов, любовью празднующим твою святую память.

Слава, и ныне: Днесь радуется небо и земля веселится, яко родися на земли Агнец Божий, Иже миру даруяй избавление. Слово, Иже в недрах Отеческих, воплотися от Девы, Иисуса видевше рожденна в Вифлееме, волхвы удивишася и прославиша Едина Преславнаго.

Песнь 4

Ирмос: Жезл из корене Иессеова:

Шествовал еси узким путем, преподобне отче, постом тело твое изнуряя, темже врага низложил еси чудным терпением твоим, преподобне **Никодиме**, Ангельския же силы восклицаху: слава силе Твоей, Господи.

Умолил еси слезами Благаго и Премилостиваго Бога, преподобне **Никодиме**, и яко дерзновение стяжавый, умоли Того, преподобне отче, да помилует мою острупленную душу, в бездну злобы воглубльшуюся.

Удобрив слезными потоки бразды души твоея, преподобне **Никодиме**, всеял еси семена добродетелей, ихже пустынными подвигами возрастил еси и пожат пшеницу в житницы своя, преблаженне отче.

Богородичен: Ты еси похвало христианом, Защитница и Прибежище, Оплот и Пристанище, Ты приносиши молитвы наша Сыну Твоему и избавляеши от бед, иже верою истинную Богородицу исповедующих Тя.

Песнь 5

Ирмос: Бог Сый мира:

Управив разумом телесныя чувства, добродейний творец показался еси, преблаженне Никодиме, гневаяся на супротивники, любовь же свою вперив к человеколюбивому Владыце.

Служитель Твой, Господи, преблаженный Никодим, отвержеся всяких земных благ и управи свой ум ко Твоим обителищем, заповедем Твоим повиновася, и вечных благ возжела, и взял свой крест, последова Тебе, Владыце мира, радуяся.

Разрушил еси оружием смирения вражия ограды, и различныя скорби претерпев, в радость Господа вшел еси. Того ради вознеслся еси, преподобне, и небесный гражданин показася.

Богородичен: Молимтися, Богородице, сохрани молитвами Твоими немощную мою и болезненную душу от множества находений Велиаровых, и послѣ ми Твой многоценный дар радости, Пречистая Дево Марие.

Песнь 6

Ирмос: Из утробы Иону:

Не возмогоша прельстити Твоего раба, Христе Боже, напасти диаволи, ниже искушений огонь, яко поживе на земли равноангельное житие, украсився божественными дарованиями и защитил еси его Своею всемошною десницею.

Прилепися, преподобне Никодиме, в любовь Господа всех, и ныне, преблаженне со Христом ликовствуеши, показася бо еси яко чисто зеркало и орган Святаго Духа, воздержание и велию любовь стяжав.

Приим светлый и невещественный зрак внутрь сердца твоего, преподобне Никодиме, тем отгнав тьму страстей, просветился еси, и отшед от мира сего, преблаженне отче, предстоиши Несозданней и Нераздельней Троице, радуяся.

Богородичен: Яже неизреченно рождающая Христа дародавца светлости, Того умоли, Пречистая, и послет и мне, грехми утесненному, зрак Своея светлости.

Кондак глас 8.

Защитниче наш во многих скорбех и напастех, / благодарственная приносим ти, чада твоя, / Но яко многомилостив и искусен помощник / с верою к тебе притекающим, / молитвами твоими от всякия ны скорби / и

напастей злых духов свободы, да зовем ти: / радуйся, великий чудотворче, преподобне отче наш Никодиме.

Икос: Возлюбив, преподобне, Христовы Божественныя заповеди и возненавидев мира сего наслаждение, притекл еси усердно ко Господу и был еси светильник, просвещаяй концы блистанием духовным. Тем, припадая, молю тя: просвети ми очи сердечныя, преподобне Никодиме, воспети твоя подвиги, пощение, бдение, слезы, болезни, изнурение тела блаженныя ради будущия жизни, еяже ныне наслаждаяся, моли непрестанно о всех нас, возлюбленне и всехвальне отче.

Песнь 7

Ирмос: Отроцы благочестию:

Умертвив телесныя страсти, грехи обуздал еси и стяжал еси награду на Небеси, преблаженне отче, и облеклся еси в силу с высоты, и притекл еси в безконечный живот, идеже ныне радостно поеши: благословен еси, Боже отец наших.

Шествовал еси правым путем добродетели и николиже того уклонися, и ныне, преподобне отче, во обителях райских непрестанно поеши: благословен еси, Боже отец наших.

Благовестил еси, преблаженне отче, благочестно славу Пресвятыя Троицы, и достигл еси Троичныя светлости, идеже ныне радостно поеши: благословен еси, Боже отец наших.

Богородичен: Преплаженная Дево, Ты еси Жезл от корене Иессеова, Иже процвете Плод спасения всем, с верою поющим Сыну Твоему: благословен еси, Боже отец наших.

Песнь 8

Ирмос: Чуда преестественнаго:

Зраком неприступныя Светлости осветился еси, преподобне Никодиме, избави от тьмы греховныя и изведи ко свету поющия: благословите Господа во вся веки.

Князь мира сего борет мя страстьми, и не могу воззрети к Тебе, Спасе, обаче молитвами преподобнаго Никодима, умилоствися, Милостиве, на мя грешнаго, и спаси мя.

Был еси Христов ревнитель, верный слуго, ученик Того тайн и истинный учитель, тем тя молим, святе Никодиме: исцели страсти душ и телес наших, да тя величаем во веки

Богородичен: Богородице Дево, моли Сына Твоего и Бога нашего, да избавит многими грехи уязвленныя и диавольскими прилогами, поющия: благословите Бога во веки.

Песнь 9

Ирмос: Таинство странное:

Тебе, ныне со всеми святыми украшенному Божественною красотою, молимся, преподобне Никодиме: моли присно Христа Бога, да украсит сердца наша Божественною Своею благодатию.

Ты, блаженне Никодиме, яко мироуханный крин райский, благоухаеши всяку душу своими молитвами и отгоняеши наша страсти, даруя нам здравие и благодать.

Иноцы, живущия в честней твоей Лавре, радостно присно тя славят, святе Никодиме, ты бо тихаго пристанища достигий, молишися Христу Богу, да и нас приведет во пристанище спасения и подаст нам велию милость.

Богородичен: Умилосердися, Господи, умилосердися, егда сядеши судити всяческая молитвами Приснодевы Марии, рождшия Тя, Христе Боже, не осуди ны во огонь и не осуди мя праведным гневом Своим.

Светилен: Прощел еси яко финикс Давидски, отче, и обитель явился еси Духа Всесвятаго, Иже славна тя вселенней показа: о нас непрестанно Христа моли, почитающих верою пречестную память твою.

Слава, и ныне, Праздника: Посетил ны есть свыше Спас наш, Восток востоков, и сущии во тьме и сени обретохом истину, ибо от Девы родися Господь.

На Хвалитех стихиры на 6: Праздника 3 и святаго 3.

Стихиры святаго, глас 6, самогласны:

Богоносне преблаженне Никодиме, вся своя телесныя помышления покорил еси духу, и утвердився воздержанием и постом, показался еси, яко злато очищено во огни, и явился еси обителище Пресвятаго Духа. Собрав же монахов множество, образом своим им высоту добродетели показал еси, яко лестницею на небо возводящую. Тем и мы ныне, славяще твой святой праздник, зовем ти: молися о спасении душ наших.

Возсия днесь, преславне Никодиме, пресветлый и всечестный твой день и притекоша многочисленныя пустынницы и верныя прославити в Троице Христа Бога нашего. Кланяющесе святому кивоту твоему и мощам, приемлем изобильно дары исцелений и прославляем Христа, Спаса душ наших.

Богоносне преблаженне отче, ты якоже рече пророк, умыл еси землю слезами и не дал еси очесем своим сна, и вдался еси всем

сердцем Христу, Егоже возлюби. Тем монашествующим образ явился еси и множество добродетелей исполнил еси. Сего ради величаем тя, слявшаще Иже тя венчавшаго.

Слава, глас 8:

Собравшися, празднлюбцы, похвальными песнями преподобнаго Никодима возвеличим, монашествующих украшение, пустынников похвалу, источник чудес и неустрашимаго Божия служителя, и возопиим: Радуйся, учителю иноком, начальниче и образе отшельническаго жития! Радуйся, пресветлый светильниче, светлостию добродетелей вся просвещаяй! Радуйся, утешителю страждущих, защитниче гонимых, всякия болезни целителю и прогонителю нечистых духов от иже ти притекающих с верою! Радуйся, прошествием своим сквозе огонь видевший удививый, и от заблуждений отвративый, ко правей вере их наставивый. Тем тя молим, преподобне отче, не престай молитися Христу Богу Спасу нашему, о твоей честней Лавре и о всех верных, почитающих и в песнях величающих твое святое усение, яко да спасение примут и велию милость.

И ныне, Праздника, глас 6:

Днесь невидимое Естество человеком от Девы совокупляется. Днесь безмерное Существо в Вифлееме пеленами обвивается. Днесь Бог звездою волхвы в поклонение приводит, провозвещая Свое тридневное погребение, яко в злате, и смирне, и ливане. Емуже поем: воплотивыйся от Девы, Христе Боже, спаси души наша.

Славословие великое и отпуст.

На Литургии

Блаженна Праздника песнь 3 и святаго песнь 6. Прокимен, глас 7: Честна пред Господем смерть преподобных Его. Стих: Что воздам Господеви о всех, яже воздаде ми? Апостол к Галатам, зачало 213. Аллилуиа, глас 8: Воскресни, Господи, в покой Твой: Стих: Клятятся Господь Давиду истинною и не отвержется ея. Евангелие от Матфея, зачало 43. Причастен Праздника, и святаго: В память вечную будет праведник, от слуха зла не убоится.

Акафист преподобному Никодиму Тисманскому

Кондак 1

Избранному угоднику Божию и преславному учителю нашему и помощнику, хвалу приношаем, мы раби твои, яко заступнику великому, но яко имеяй дерзновение пред Господем, от всяких нас бед свободи, да зовем ти: Радуйся, отче Никодиме, чудотворче.

Икос 1

Ангели на Небеси хвалят тя, преподобне отче, равноангельному житию твоему дивящися: инок же множество, сицевыя песни радостно приносят ти: Радуйся, ангелов удивление: радуйся, демонов прогонителю. Радуйся, райское всеплодие: радуйся, безплотных подражателю. Радуйся, преподобных венче: радуйся, благо духовное душ наших. Радуйся, своя Лавры защитниче: радуйся, монахов учителю. Радуйся, светлосте небесная: радуйся, сущих во узах прибежище. Радуйся, сосуде Духа Святаго: радуйся, пустынный веселие: Радуйся, отче Никодиме, чудотворче.

Кондак 2

Видяще твою от юности ангельскому житию ревность, отче Никодиме, и еже на Святей Горе Афонстей подвижи твоя иноческа и любовь твою Божественную, дивимся, и песнь о тебе приносим Богу: Аллилуиа.

Икос 2

Разумевши Лавра Хиландарская тя отрасль корене владычня, в немже Дух Божий обитает, в веселии прият тя, мы же силе благодати сущей в тебе дивящися, отче, радостию поем сице: Радуйся, Святыя Горы похвало: радуйся, богословия пресветлый уме. Радуйся, подвижниче ревностный: радуйся, Лазаревичей светлосте. Радуйся, сердце, духовныя радости исполнено: радуйся, фимиаме благоприятный. Радуйся, подателю душам нашим потребнаго: радуйся, всякаго зла отвратителю. Радуйся, Саввы Неманича сродниче: радуйся, в егоже святей Лавре подвизавыйся. Радуйся, небесный человек: радуйся, земный ангеле. Радуйся, отче Никодиме, чудотворче.

Кондак 3

Силою Божественною бысть прот Лавре Хиландарстей, преподобне отче, и образ подвиг духовных: мы же, имуще тя заступника велия, радостно поем Богови: Аллилуиа.

Икос 3

Имуще звание от Бога, святе, да идеши во ину землю, еже просветити ю духовне правила Святыя Горы Афонския, благословение Матере Божия прият, сие исполни, преподобне: и стада монахов возрастил еси, образ тем быв, яже приношают ти сице: Радуйся, монахов светлосте: радуйся, утешение наше. Радуйся, усердный подвижнице: радуйся, всех божественных даров исполнение. Радуйся, иноческаго жития устроителю: радуйся, пустынное процветение. Радуйся, во узах сущих помощнице: радуйся, нечистых духов прогонителю. Радуйся, отче богоносне: радуйся, от всякаго зла защитнице. Радуйся, пастырю преблагий: радуйся, Православия охранителю. Радуйся, отче Никодиме, чудотворче.

Кондак 4

Бурю волн Дунавских укрощая, тыя крестом оградил еси, святе, яко рече ти великий Антоний, и яко по суху на другую страну прешел еси, воспевая Богу: Аллилуиа.

Икос 4

Слышав воевода Влайко желание твое, отче, обитель устроить, в нову землю пришедшу, исполни и, и милостивно ти глаголаше: Радуйся, ангеле благовестнице: радуйся, монашеских уставов хранителю. Радуйся, яко и волны дунавския послушаху тя: радуйся, от Великаго Антония благословение приявый. Радуйся, христиан благочестивых радости: радуйся, многих людей просветителю. Радуйся, всех христианских земель веселие: радуйся, яко сын теми приятый. Радуйся, у Водицы пустынником место освятивый: радуйся, яко труды твоя Бог благослови. Радуйся, дальних краев просветителю: радуйся, смирения велий учителю. Радуйся, отче Никодиме, чудотворче.

Кондак 5

Якоже желает елень на источники водныя, тако и твоя душа, отче, божественным званием вселися при источниках вод в пещере, со Ангелы купно поющи Богу: Аллилуиа.

Икос 5

Егда изгнал еси демона из пещеры, иже ти возбранити бе хотя, четыредесет дней и четыредесет ночей провел еси в

непрестанной молитве, да Бог ти откроет волю Свою, идеже воздвигнешь великую лавру в честь Его Пречистой Матере: тем услыши Бог желание твое, мы же ти с радостью поим сице: Радуйся, в пещере подвизавыйся: радуйся, яко исполнился молитва твоя. Радуйся, святых подвигов любителю: радуйся, высшую духовную науку познавый. Радуйся, божественных вещей строителю: радуйся, монашеских соборов учителю. Радуйся, на высоту возвысивыйся: радуйся, сердец христианских утешение. Радуйся, святых Божиих мест ревнителю: радуйся, Святаго Духа обителище. Радуйся, отче, наш учителю: радуйся, божественных даров приемниче. Радуйся, отче Никодиме, чудотворче.

Кондак 6

Егда в молитве бдел еси на камени три дни и три ночи, отче, божественная светлость осия тя и яко светлый столп от неба до земли явился, из негоже Бог заповеда ти, да на том месте воздвигнешь жертвенник, ты же, светлостью Духа Святаго озарена, со слезами радостно воспевал еси Богу: Аллилуиа.

Икос 6

Собрав ученик множество, отче, воздвигл еси в Тисмане лавру великую, идеже деннонощно возношаше молитвы Долготерпеливому Богу, Иже тобою творяше велия и славныя чудеса: мы же, твоя чада духовныя, в теплоте Духа воспеваем ти таковая: Радуйся, отче, наш учителю: радуйся, о нас пред Богом теплый молитвенниче. Радуйся, сокровищнице Духа Святаго: радуйся, Святаго Духа благое обителище. Радуйся, помилование наше: радуйся, яко молитвами твоими ны непрестанно призираеши. Радуйся, даром слез исполненный: радуйся, яко пролитием слез сосуд Духа Святаго показавыйся. Радуйся, пастырю иноков: радуйся, христиан защитниче. Радуйся, светлосте христианских земель: радуйся, цевнице песней духовных. Радуйся, отче Никодиме, чудотворче.

Кондак 7

Светлостью жития твоего, отче, удостоился еси великих дарований, еже и нечистыя духи лукавыя изгоняти: и многия ко православной вере обратил еси, преподобне: того ради радостно хвалим тя, поюще Богу: Аллилуиа.

Икос 7

Егда угорский краль Сигизмунд проси милость твою о дщери его, яже бе одержима нечистым духом издетска, и видев ю здраву и исцелену твоим предстательством к Богу, со слезами возопи ти тако: Радуйся, отче утешения: радуйся, уставляяй болезни верных сердец. Радуйся, прибежище на тя надеющихся: радуйся, духовный целителю душ христианских. Радуйся, краля Сигизмунда удивление: радуйся, воеводе Мирче похвало. Радуйся, яко тя Сигизмунд послуша: радуйся, яко той водою Крещения просветися. Радуйся, проповедниче Православия: радуйся, губителю ереси. Радуйся, святых правил ревнителю: радуйся, правыя веры проповедниче. Радуйся, отче Никодиме, чудотворче.

Кондак 8

Естество пламене победил еси, отче, посреде огня надолзе невредим пребыв, преблаженне: вкупе со учеником твоим в пламени вопия Богу: Аллилуиа.

Икос 8

Чудящися зело беху Сигизмунд и Мирча и множество верных, тя видевшя посреде огня невреждена, отче, и хваляще силу Божию, тя хранящую, пояху ти сице: Радуйся, естество превозшедый: радуйся, Божественныя благодати исполненный. Радуйся, яко и огонь тебе повинуся: радуйся, яко посреде пламене стой, духом в горних был еси. Радуйся, божественный уме: радуйся, ангеле в естестве человечестем. Радуйся, яко всяк ум превышаети: радуйся, яко всех искушающих уничижаеши. Радуйся, яко вси немы пребыша пред чудесы твоими: радуйся, отче, огнем любви Христовы распалаемый. Радуйся, возлюбленниче Духа Святаго: радуйся, славо твоя святых Лавры. Радуйся, отче Никодиме, чудотворче.

Кондак 9

Егда прииде время твоего отшествия от сего жития к Богу, был еси о том извещен, преподобне отче. Изшед же в последний путь от пещеры во святую Лавру, на пресветлый праздник Рождества Господня, вкупе со ученики твоими воспел еси Божественному Младенцу: Аллилуиа.

Икос 9

Велия печаль объят вся, отче, уведевшия о твоём прехождении от жития сего: обаче одушевлени твоим обетованием предстательствовати за них пред Богом и за вся, иже твоя

помощи требуют, в радости пояше ти тако: Радуйся, предстателю твоея Лавры: радуйся, прибежище на тя уповающих. Радуйся, духовное ограждение: радуйся, наша сило духовная. Радуйся, Тисманский ангеле хранителю: радуйся, сладчайший монахом учителю. Радуйся, кораблю мысленный: радуйся, пристанище спастися хотящим. Радуйся, наше благословение: радуйся, прибежище напастуемым душам. Радуйся, светильниче, светом Духа Святаго светяй: радуйся, ангельский уме, Божия премудрости исполненный. Радуйся, отче Никодиме, чудотворче.

Кондак 10

Видевше преселение преподобнаго отца нашего Никодима освященнаго от земли на Небо, отвратимся и мы суетнаго мира, и възыдем на божественную лествицу, да с ним вкупе воспоим Богу: Аллилуиа.

Икос 10

Приидите, вернии да возвеличим дивнаго во святых, учителя монахов и похвалу верных от Тисманския лавры и венец Горжа, великаго в преподобных Никодима и единоголасно да воспоим песни хвалы: Радуйся, нас Божиим путем научаяй: радуйся, ненаученных учителю. Радуйся, райское наслаждение: радуйся, звездо, Божественною светлостию блистающая. Радуйся, от младости Бога изволивый, мира сего отвративыйся: радуйся, яко на твоих раменах понесе благий и легкий ярем Божий. Радуйся, нечистых духов изгонителю и обидимым помощниче: радуйся, чад от всякаго зла избавителю и радости тех верных родителей. Радуйся, скорое христиан утешение: радуйся, врачу духовный. Радуйся, сущих в неволе утешителю: радуйся, избавителю наш и диавола побеждение. Радуйся, отче Никодиме, чудотворче.

Кондак 11

Никакоже престанем проповедати твоя многочисленныя чудеса, отче Никодиме, всяку бо болезнь исцеляеши и вся твоею богатою помощью и милосердным заступлением от бед избавляеши, того ради радостно хваляще тя, поим Богу, Иже тя прославльшему: Аллилуиа.

Икос 11

На тя присно надеющися, тя славим, преподобне отче Никодиме, ты бо венцем живота украсился еси во славе Божественныя светлости, и во веки образ благочестивым душам являеши, тем радующися, мы, служители твоя, благочестно тя

превозносим и прославляем, зовуще сице: Радуйся, многоценный крине и духовнаго жития крепосте: радуйся, венче преподобных и защитниче христиан. Радуйся, всех преподобных и всех святых сожителю: радуйся, Божественная славы наследниче. Радуйся, единоголасное верных пение: радуйся, благочестия избранный плоде. Радуйся, светом жития твоего вся благочестию научаеши: радуйся, делателю тайных молитв, яже есть меч Духа Святаго. Радуйся, невидимых врагов низложителю: радуйся, яко твоим духовным наследием Богу поклоняемся. Радуйся, кандило горящее святых подвигов: радуйся, яко вси вернии тя с верою почитают. Радуйся, отче Никодиме, чудотворче.

Кондак 12

Дивящаяся божественной благодати, действующей в твоих прославленных святых мощех, отче Никодиме, и помышляюще о светлости, еюже ты Бог украси, с неизреченною радостью поем, вернии, Благодетелю: Аллилуиа.

Икос 12

Показался еси образ кротости, отче, и исполнився Божественная благодати, вся просветил еси, мы же тобою духовнаго мира исполняеми, поим ти сице: Радуйся, отче: радуйся, архимандрите. Радуйся, обителище благодати: радуйся, Духа Святаго сосуде. Радуйся, преславная деннице: радуйся, от Бога прославленный. Радуйся, преподобне отче: радуйся, зовем ти, светом осияваеми. Радуйся, наш добрый пастырю: радуйся, сирых утешение. Радуйся, прибежище угнетаемых: радуйся, светлосте заблуждших. Радуйся, отче Никодиме, чудотворче.

Кондак 13

О преподобне отче Никодиме, прими сие усердное моление наше и ходатайствуй нам милости Вышняго, и от всякаго искушения избави нас, свободи же нас муки вечныя, ты хвалящих и поющих Богу: Аллилуиа.

Молитва:

О святыи преподобный отче Никодиме, прими сие умиленное моление наше и проси милости нам пред Престолом Божиим. Избави нас, преподобне, славящих тя, от всякаго лютаго обстояния, веси бо немощи естества нашего, обаче и веру зриши и въздыхания слышиши: темже не остави нас, отче, притекающих к тебе. Моли убо Господа за ны недостойныя, яко да простит нам грехи наша и да подаст нам любовь и помощь выну добро

**творити во славу Пресвятаго Имене Его. Тебе просим и молим
тя: помози нам отче, грешным, искушеньми злыми
прельщаемым, обаче в сокрушении середечнем тебе
призывающим, яко да покроеши и сохраниши ны от
смертоносных стрел супротивника нашего диавола, яже смертно
ураняют души наша. Помилуй к тебе притекающия, исцеляя
немощи их, и якожде исцелил еси девицу некую, от нечистаго
духа мучиму, тако и нас, отче, избави от всех душевных и
телесных болезней наших, да твоим предстательством спасени,
выну возносим славу, хвалу и поклонение: Отцу и Сыну и
Святому Духу, ныне и присно и во веки веков. Аминь.**

